



Paaloost já iiloost

Palo já ilo. Mun arvâlâm, ete taah kyehti tobdo láá mijjân puohháid uáppáseh. Puáhtá leđe, ete toh láá jiešalnees maangâ mii ääigi ulmuu vuáđutobdoh. Toh joteh paldlúvâi. Olmooš, kote tobdá motomijn aášijn ilo já áávu, puáhtá meid siämmáá ääigi tubdâđ vuáđustállum palo mainnii eres aášijn.

Ko juurdâš maailm äigikyevdilis tábáhtusâi virde, te maangâsij mii tobdo sáttá leđe tuot palo. Palo puáhtá njaahâđ mielân, ko mij smiettâp sođijd Ukrainast já Israelist já Palestiinast teikâ šonjâdâhnuvástus tâi ruossâlâsvuodâi lasanem maangâin ohtsâškuudijn. Mađe stuárráb aášijn lii koččâmuš, tađe haaldâšmettumin toh sáttih orroođ.

Tai pessijái evangeliumteevstâst láá meid mielđi palo já ilo; teikâ jiešalnees ilo vuáimálâš häämi adai áávu. Tekstâ nohá saanijd:

Nisoneh vuolgijn tállân häävdi kulen, siämmáá ääigi polâmáin já áávvudmáin, já tomâlain tuálvuđ sääni Jeesus máttááttâspárnáid. (Matt. 28: 8)

Nisoneh láin Magdala Máárjá já "tot nubbe Máárjá". Jeesus aldasiih čuávvooh kuohtuuh. Tekstâ kovvee, magareh tobdoh nisonijn lijji, ko suái kavnáin pessijâšiideed Jeesus häävdi kuárusin.

Häävdi kulen vuálgám kyehti Máárjá láin evangelium mielđ siämmáá ääigi poollâm já ávudâm. Forgâ suái uázžuv jieš-uv kuáhtáđ Pajaspajanâm Jeesus. Liijká tuot tobdoi juáhásem, sehe poollâm já ávudem, sárnuttâl muu.

Palo kovvee sii moiváskem. Áávu vuod tom, ete suái iberdáin jieijâs váimusist tom, ete jäämmim ij lamaškin majemuš muddo Jeesus puotâ. Sun pajanij jámimist. Ristâlii osko kuávdášlâš saahâ lii onne-uv taat: Jeesus iälá!

Mun tuáivum já ruhâdâlâm, ete taat pajaspajanem ilo puáđáččij mijjân-uv, kiáh ávudep pessijái kiddyttäälvi 2024. Ubânâsân ilo elimân puáhtá kavnuđ tast, ete kiáččá alda orroo uccâ aášijd, main puáhtá leđe kijttevâš. Kenski tuu mielân puátá, kiinii olmooš, kiäst tun puávtáh leđe kijttevâš. Tun puávtáh meid finniđ ilo jieijâd elimân, ko išedah nube ulmuu veikâba tuš uccâ keevâtlíi ääšist. Ilo lassaán, ko tom juáhá.

Mun tuáivuttâm Tunjin rávhálâšvuodâ já ilo puáttee pessijái. Mun tuáivum, ete maailm kriisahkin iä vääldi mii ilo tast, ete ellee Pestee, Jeesus, lii lopedâm leđe miiguin jyehi peeivi. Immeel sivnedus mii stuorrâ juhle.

Ovdláhháá pessijái 2024

Jukka Keskitalo
Oulu pispekode pispe